



UPA 2015/58+115

Tillie Martinussen

21. april 2015

Inatsisit attuumassuteqartut allanngortinneqarnissaannut siunnersuummik UPA 2016-imut Naalakkersuisut suliniuteqaqqullugit peqquneqarnissaat pillugu Inatsisartut aalajangiiffigisassaattut siunnersuut, taamaaliornikkut inoqutigiit 400.000 kr.-t ataallugit isertitallit napparsimasut angerlarsimaffianni nerisaqarnermut ineqarnermullu akiliuteqartarunnaarsinnaaqqullugit.

(Inatsisartunut ilaasortaq Anthon Frederiksen, Partii Naleraq)

(Siullermeernera)

Pinartumik napparsimasoqartillugu ilaqutaasut Københavnimi kalaallit peqqissartut najugaqarfianni ineqartinneqartillugit ineqarnermut aningaasartuutit 2016 aallarnerfigalugu pisortanit akilerneqartalernissaat sulissutigeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Mimi Karlsen, Inuit Ataqtigiit)

(Siullermeernera)

Uani suliarissavagut siunnersuutit marluk napparsimasut qanigisaminnik ingiallorneqartalernissaannut ajornannginnerulersitsisussat.

Pingaaruteqarpoq allaqqaataani naqissusissallugu, Namminersorlutik Oqartussat immikkoortumi annertuumik suliniuteqareermata. Meeqqat inuusuttullu 18-t inorlugit ukiullit qanigisaminnit ingiallorneqarsinnaatitaapput tamatumalu saniatigut napparsimasut perulunnartumik nappaatillit aamma aallarunneqarnerminni qanigisaminnit ingiallorneqarsinnaatitaapput. Demokraatini isumaqarpugut, inuiaqatigiittut perruualaarutigisariaqaripput, innuttaasut taamaattumik neqeroorfigneqarsinnaammata.

Siunnersuutit Partii Nalerameersup kiisalu Inuit Ataqtigiinneersup napparsimasut ingiallorteqarnissaannut periarfissat annertusitissavaat. Aamma qularutissaanngilaq eqqarsaat iluarinarlunilu pitsaammat. Kisianni imaanngilaq eqqarsaat kusanarluinnartuusoq.

Tassami ullut tamarluinnaasa peqqinnissaqarfimmut inuiaqatigiinnilu naliginnaasumik aningaasaliissutit naammattusaarneqartuarput. Allatut oqaatigalugu pingaarnersiuisariaqarpugut aningaasat qanoq atussanerlutigit. Demokraatini tassani isumaqarpugut napparsimasunik ingiallorteqartitsisarnerup annertusinerata pingaarnertinnissaa kukkunerussasoq. Peqqinnissaqarfimmut amerlanerusunik aningaasaliissagutta atorusunneruagut inuulluataarnerup kinguneranik napparsimalersarnerup pinaveersaartinnissaanut aamma kræftimut katsaanermut, pitsaanerusumik nakorsaasarnissamut ilaalu ilanngullugit. Allatut oqaatigalugu aningaasat



atorusunneruagut peqqinnissaqarfimmi napparsimasunullu katsorsaanerup
pitsanngorsarnissaanut aningaasat atornagit napparsimasunut ingiallorteqartitsisarnerup
annertusarnissaanut.

Taamatut oqaaseqarluta inassutigaarput siunnersuutit itigartinneqassasut.